

Fundargerð

Efni fundarins: Aðalfundur VR 2016

Fundarstaður og dagsetning: Hótel Hilton Reykjavík Nordica, 29. mars 2016, kl. 19:30.

Mættir: 90 félagsmenn VR

Fundarritari: Árni Leósson

Málsnúmer í One: 1512076

Dagskrá

1. Kosinn fundarstjóri

Ólafía Björk Rafnsdóttir, formaður VR, setti fund kl. 19:30 og bauð fundargesti velkomna til aðalfundar VR 2016. Að því búnu stakk hún uppá að Guðmundur B. Ólafsson, lögmaður VR, yrði fundarstjóri. Ekki komu fram aðrar tillögur og var Guðmundur því kosinn fundarstjóri með lófataki og tók hann þá við stjórn fundarins.

Guðmundur sagði að fundarboð hafi verið samkvæmt 23. gr. laga félagsins og hefði hann kannað að öllum skilyrðum hafi verið fullnægt og lýsti fund löglega boðaðann.

2. Kosinn ritari

Guðmundur stakk uppá því að Árni Leósson, sviðsstjóri hjá VR, yrði fundarritari. Ekki komu fram aðar tillögur og var Árni því kosinn fundarritari með lófataki og hóf ritun fundargerðar.

3. Veiting gullmerkis VR

Guðmundur óskaði eftir leyfi fundarins til þess að bregða út af hefðbundinni dagskrárröð svo veita mætti tveimur félagsmönnum gullmerki félagsins. Engar athugasemdir komu við því og tók þá Ólafía Björk til máls og bað þau Elínu Elíasdóttur og Val M. Valtýsson að stíga fram.

Afhenti hún þeim gullmerkin og blómvendi og sagði m.a. að Elín hafi verið félagsmaður í VR í samfelld 52 ár og í rúmlega 20 ár var hún mjög virkur þátttakandi í öllu félagsstarfi VR þar sem hún sat í stjórn félagsins, m.a. sem varaformaður VR í 3 ár. Áhugi Elínar á félagsstörfum VR og uppbyggingu á orlofssvæðum félagsins auk ómetanlegrar vinnu og tíma sem hún hefur gefið félaginu gerir hana að sérstaklega verðugum handhafa gullmerkis félagsins. Félagið og öll stétt verzlunar- og skrifstofufólks á Íslandi stendur í þakkarskuld við Elínu.

Um Val sagði hún m.a. að hann hafi verið félagsmaður VR í samfelld 47 ár og þar af heil 30 ár í trúnaðarráði og 10 ár í stjórn VR. Val sagði hún sérlega vel að því kominn að vera sæmdur gullmerki félagsins þar sem hann hafi ekki aðeins gefið af tíma sínum og starfsorku við stjórn félagsins heldur hafi hann ávalt sýnt sérstaklega mikla trúmennsku og áhuga fyrir öllum þeim verkefnum sem hann hefur verið beðinn um að taka að sér. Fáir hafa mætt eins vel á alla fundi félagsins og því óhætt að segja að hann hafi með miklu og löngu félagsstarfi hjá VR lagt þung lóð á vogarskálar stéttarbaráttu verzlunar- og skrifstofufólks á landinu.



Að þessu sögðu var gullmerkishöfum fagnað með lófataki og stóðu fundargestir á fætur þeim til heiðurs.

Undir þessum dagskrárlið bað Ólafía Björk síðan annan félagslega kjörinna skoðunarmanna félagsins, Hildi Mósesdóttur, að stíga fram. Sagði hún að bæði Hildur og Halldór Halldórsson, sem boðað hafði forföll á fundinn, væru nú að hætta sem skoðunarmenn og þakkaði hún þeim fyrir vel unnin störf þeirra og afhenti Hildi blómvönd sem þakklætisvott undir lófataki fundarmanna.

4. Skýrsla stjórnarinnar um störf félagsins undanfarið starfsár

Ólafía Björk flutti nú skýrslu stjórnar og kom m.a. fram í máli hennar að kjaramálin hafi sett svip sinn á það starfsár stjórnar VR sem nú er að líða. Tvívegis var skrifað undir kjarasamninga við atvinnurekendur og tvívegis gengu félagsmenn VR til atkvæða um samningana og samþykktu þá í bæði skiptin. Svo gengu félagsmenn til atkvæða um allsherjarverkfall og er það í fyrsta skipti í nær þrjá áratugi sem félagið ber slíkar aðgerðir undir atkvæði.

Ræddi hún þá lok verkefni sem bar heitið Starf og sneri að vinnumiðlum og öðrum aðgerðum til að efla atvinnuleitendur. Um var að ræða tilraunaverkefni til þriggja ára – verkefni sem skilaði miklum árangri. Þegar verkefninu lauk ákvað VR að halda áfram þjónustu við þá félagsmenn sem eru í atvinnuleit - en á sínum forsendum.

Sérfræðingar VR á sviði kjaramála fengu inn á sitt borð hátt í sextán hundruð mál á síðasta ári sem er örlítill aukning frá fyrra ári. Teikn eru á lofti um aukinn hreyfanleika á vinnumarkaði sem er ánægjulegt.

Sjúkrasjóður VR er ein meginstöð þjónustu félagsins við félagsmenn og stendur sjóðurinn styrkum fótum. Rétt rúmlega eitt þúsund félagsmenn fengu styrkveitingu af einhverju tagi úr Sjúkrasjóði á árinu 2015 sem er um eitt hundruð fleiri en árið áður. Það sem vekur athygli er mikil aukning í greiðslu sjúkradagpeninga vegna geðraskana og stoðkerfisvandamála á síðustu árum. Þetta er þróun sem við verðum að bregðast við og vera meðvituð um líðan fólks á vinnumarkaði. Virk starfsendurhæfingarsjóður, sem stofnaður var á grundvelli kjarasamninga árið 2008, er mikilvægur hlekkur í þeirri þjónustu.

Fræðslumálin hafa síðustu ár verið í ofarlega í forgangsröðinni. Breytingar hafa verið gerðar á reglum starfsmenntasjóðanna á síðustu tveimur árum og ljóst að þær hafa skilað miklum ávinningi. Markmiðið var m.a. að hvetja félagsmenn til frekari þátttöku í símenntun.

Annað sem einnig hefur verið ofarlega á lista hjá VR síðustu ár er jafnrétti kynjanna. VR hefur reyndar barist fyrir jafnrétti síðustu áratugi, með ágætum árangri. Þó að dregið hafi saman með kynjunum benda tölur til þess að við þurfum að bíða í rúma tvo áratugi eftir því að kynin fái sömu laun fyrir sömu vinnu.

Í ár á Alþýðusamband Íslands eitt hundruð ára afmæli. Af því tilefni hefur ASÍ ákveðið að standa fyrir stofnun almenns íbúðalánafélags. Hér er um að ræða merk tímamót sem við hjá VR fögnum mjög, enda höfum við lagt áherslu á að finna verði lausn á húsnæðisvandannum. Sagðist Ólafía Björk binda miklar vonir við nýtt íbúðalánafélag og trúir því að við sjáum fram á bjartari tíma.



